

ich slahen uf die phfant, die sal mi min herre leisten mit deme andere gelde. Tete min
 herre dez nicht, so solden mi die phfant vorstanden sin. Und min herre der maregreve
 behalden sin berewere, daz mi min herre nicht gesaczt hat. Die phfant hat mi min herre
 der maregreve also vorsaczt, daz he noch ich, die wile si sten, in der stad czu Vribere noch
 uf deme lande, daz dazzu gehort, kein geschoz seezen sullen. Ich Heinrich Knut habe 5
 minem herren dem maregraven ouch entriwen gelobet, daz im und sinen luten und sinem
 lande kein schade sulle geschehen uz der stad noch von deme hus. So hat mi min herre
 der maregrave daz wider gelobet, daz he deme huse noch der stad noch deme lande,
 daz in daz gerichte gehort, keinen schaden tun sal noch nymant von siner wegen noch
 ouch nicht anc gewinnen sal. Tete he daz, so hat he erlobet den edeln vorsten sinem 10
 vettern minem herren maregreve Woldmer und sinem omen graven Albrechte von Ane-
 halt, daz sie mi behulfflich sin uf minen herren den maregreven, biz daz mi mine phfen-
 ninge wider werden. Gesche aber, des got nicht enwolle, daz mi Heinriche Knvte die
 stad und daz hus czu Vribere, die wile si phfandes sten, anegewunnen worden anc mine
 schult, so hat gelobet min herre maregreve Woldmer und min herre maregrave Friderich 15
 von Misne und min herre grave Albrecht von Anehalt und ich Heinrich Knüt, daz wy
 mit einandir behulffic sullen sin uf die, dy si mi anegewunnen, und uns mit den nicht be-
 richten sullen, biz daz minem herren maregreven Frideriche hus und stad wider werde
 und mi Heinriche Knut mine phfenninge. Ich Heinrich Knut habe ouch entriwen ge-
 lobet minem herren maregreven Friderich und sinem omen minem herren graven 20
 Albrechte von Anehalt, daz ich alle dise réde ganz unde stete halden sulle und im
 Vribere hus und stad czu losene sullen geben uf die tage als vor beschriben stet. Were
 aber daz min herre maregreve Friderich binnen dez abeginge, des got nicht enwolle, so
 sal ich Heinrich Knut die phfant czu losene geben minem herren graven Albrechte von
 Anehalt sinem omen. Tete ich des nicht, so sullen min herre maregrave Woldmer und 25
 min herre grave Albrecht minem herren maregreven Frideriche behulffen sin uf mich,
 biz daz im sin stad und sin hus wider wurden. Daz ich alle dise rede, die hie beschriben
 stet, ganz und stete halde, das haben mit mi und vor mich entriwen gelobet an allerleige
 argelist mine vrunt, die hienach geschriben sten: her Bernhart, her Fritze und her
 Tyme von Strele die gebrudere, Albrecht Knut min bruder, her Jan von Geilnowe, her 30
 Tamme von Haldekke, her Heine von Kyrchs Dorf min ome und her Albrecht von Maret-
 werben und haben alle mit einandir czu einem geezugnisse dirre rede unse ingesigele
 gehenget an disen brief. Dise rede ist geteidinget und geschehen czu Lipezk uf deme
 hús vor den edelen vorsten minem herren maregraven Woldmer von Brandenburch und
 graven Albrechte von Anehalt unde vor a[n]dern biderben herren und biderben leuten 35
 gnúe nach der geburt gotes tusend jar dri hundert jar in dem czwelftem jare an sente
 Peters abent dez apostoln also he entpunden wart.